

FILIPAI

¹ E Pol. Aqo Timoti wo Kristus Yesus aqa wau tamo unum. Aqo aiyel na anjam endi nenngrenyonum. Nenngrenyosim ningi Kristus Yesus aqa segi tamo ungasari Filipai qureq di unub qaji nunngoq qarinyonum. Nunngo Kristen gate nanngi ti nunngo wau tamo nanngi qa ti dego anjam endi qarinyonum. ² Gago Abu Qotei wo Tamo Koba Yesus Kristus wo nanngi aiyel ningi qa are boleinjrimqa ningi lawo na soqniy.

Pol a Filipai Kristen nanngi qa Qotei pailyeqnu

³ E bati gaigai ningi qa are qaloqnsim deqa e ijo Qotei binjiyeqnum. ⁴ Osim gaigai arebolebole na ningi kalil qa pailyeqnum. ⁵ Ningi nami iga betergosib Yesus aqa anjam bole mare mare laqneb. Agi bini ningi degyeqnub. Deqa e ningi qa tulan areboleboleibeqnu. ⁶ E endegsi qalieonum, Qotei a nunngo are miligiq di wau boledamu yeqnu. A nami wau di utru atej. Ariya bini a wau di yeqnu dena gilsim gilsim mondorj Kristus Yesus olo bqajqa batiamqa a na wau di kobotqas. ⁷ Ningi ijo are miligiq di unub deqa e kere ningi qa are qaleqnum. E tonto talq endi sqai kiyo e walwelosiy Yesus aqa anjam bole singilatoqnsiy mare mare laqnqai kiyo di unum. Qotei a e qa are boleiyosiq wau ebej deqa ningi kalil e beterbosib e ti koba na Qotei aqa wau ojeqnum. ⁸ Kristus Yesus a na iga tulan qalaqalaigeqnu. Aqa kumbra dena ijo are tigeltetbej deqa e ningi kalil olo nungwajqa are koba unu. Di Qotei a segi qalie.

⁹ E bati gaigai ningi qa endegsi Qotei pailyeqnum, “O Abu, ni na Filipai Kristen nanngi aqaryainjrimqa nanngi

qalaqalaiyo kumbra nanjo are miligiq di tulanj singilatosib dauryqab. Osib powo koba ti areqalo bole ti sqab.”¹⁰ O ijo was, ningi kumbra kalil geregere tenemtosib kumbra bole segi yoqniy. Ningi degyqab di mondoj Kristus a olo bosim tamo ungasari nanji peginjrqqa batiamqa ningi une saiyoji sqab. ¹¹ Kumbra bole kalil Yesus Kristus a segi na babteqnu qaji di nunjoq di tulanj kobaoqnimqa Qotei aqa ñam goge oqoqnqas. Utru deqa e ningi qa Qotei pailyeqnum.

Pol a tonto talq di unu

¹² O ijo was, ningi endegsib qalieoiy, jeu tamo nanji na e tonto talq endi waibeb unum. Ariya nanji Yesus aqa anjam bole getentosai. Anjam bole di olo tulanj singilaeqnu. ¹³ Tamo kalil nanji qalie, e Kristus Yesus aqa wau ojoqnem deqa jeu tamo nanji na e tonto talq endi waibeb unum. Tonto tal taqato tamo nanji dego qalie. ¹⁴ E tonto talq endi unum deqa Kristen was gargekoba nanji Tamo Koba a qa nanjo areqalo singilatoqnsib aqa anjam palontqajqa ulaosaieqnum.

¹⁵⁻¹⁷ Bole, tamo qudei na ijo ñam tentib aguq aiqajqa deqa are qaloqnsib nanjo are uge na Kristus aqa anjam mare mare laqnum. Nanji nanjo segi ñam soqtqajqa are qaloqnsib Kristus aqa anjam mare mare laqnum. Nanji tamo aqaryainjrqajqa deqa are qalosaieqnum. E tonto talq endi soqnit nanji ijo are ugetetbqajqa deqa are qaloqnsib Kristus aqa anjam mare mare laqnum. Ariya tamo qudei nanji are bole na Kristus aqa anjam mare mare laqnum. Tamo di nanji qalie, e Yesus aqa anjam bole singilatqajqa waueqnamqa jeu tamo nanji na e tonto talq endi waibeb unum. Deqa nanji e tulanj qalaqalaiboqnsib Kristus aqa anjam mare mare laqnum. ¹⁸ Deqa unqum. Tamo nanji are bole na Kristus aqa anjam mare mare laqnum kiyu tamo

nanġi are uge na Kristus aqa anjam mare mare laqñub kiyo di kere. Nanġi kalil koba na Kristus aqa anjam mare mare laqñub deqa e tulañ areboleboleibeqnu.

Pol a are qalej, “E mandamq endi sosiy Filipai Kristen nanġi aqaryainjroqñqai”

¹⁹Deqa ijo was, e tulañ areboleboleibim sqai. Di kiyaaqa? E qalieonum, Qotei a nuñgo pailyo na ti Yesus Kristus aqa Mondor na ti e aqaryaibosim tonto talq endena oqeġ atim e bole sqai. ²⁰Deqa ijo are koba endegsi unu. Wau kalil Qotei na ebej qaji di e gegerere ojoqñqai. Yim deqa e jemaibqasai. Bini bati endeqa ti bunuq qa ti e siñgila na tigelosiqñsiy ijo jejamu Kristus torei yekritosiy aqa ñam soqtoqñqai. Agi e kumbra degyeqnum. Deqa e moiqai kiyo e sqai kiyo di unġum. E ijo kumbra kalil qa Kristus aqa ñam soqtoqñqai. ²¹Ijo are koba endegsi unu. E sqai di e Kristus ombla sqai. Ariya e moiqai di e olo inġi tulañ boledamu oqai. ²²E mandamq endi sosiyqa e tamo unġasari gargekoba nanġi aqaryainjroqñqai. E gam kiye dauryqai di e qaliesai. ²³E areqalo aiyeltejunum. Ijo areqalo bei agiende. E lañ qureq oqsiy Kristus ombla sqai. E degyqai di tulañ bolequja. ²⁴Ariya e mandamq endi sosiy niñġi aqaryainjroqñqai di dego bolequja. ²⁵Deqa e are qalonum, e mandamq endi sqai. E qalieonum, e urur moiqasai. E mati sosiy niñġi koba na Yesus aqa wau ojoqñqai. Yim wau dena niñġi Yesus qa nuñgo areqalo gegerere siñgilatoqsib areboleboleiñġim sqab. ²⁶Deqa ijo was niñġi quiy. E olo nuñgoq bosiy niñġitqa bati deqa niñġi e qa tulañ areboleboleiñġim Kristus Yesus aqa ñam soqtoqsib sqab.

Niñġi Kristus aqa ñam qa jaqatiñ oqñqab

²⁷Ijo anjam kobaquja bei agiende. Niñġi Kristus aqa anjam bole gegerere dauryoqñiy. Niñġi degyqab di e

anjam endegsi quqwai, “Bole, Filipai Kristen nanği are qujaitoqnsib waukobaeqñub. Di kiyaaqa? Tamo unğasari nanği Yesus aqa anjam bole nanğo areqaloq di siñgilatqajqa deqa.” O ijo was, e olo nuñgoq bosiy nuñgwai kiyo e tonto talq endi sqai kiyo di unğum. ²⁸ E qalieqai, niñgi nuñgo jeu tamo nanği qa ulaosaieqñub. Nuñgo kumbra dena jeu tamo nanğo are qametnjreqnaqa nanği endegsi poinjreqnu, “Bole, iga padalqom.” Ariya ijo was, niñgi padalqasai. Qotei na niñgi eleñam niñgi so bole gaigai sqab. ²⁹ Niñgi quiy. Qotei na niñgi giltñgej. Di kiyaaqa? Niñgi Kristus qa nuñgo areqalo siñgilatqajqa deqa. Deqa segi sai. Niñgi aqa ñam qa jaqatiñ oqajqa deqa ti niñgi giltñgej. ³⁰ Nami e jeu tamo nanği ti Qotei aqa anjam na qoteqñam niñgi e nuboqñeb. Agi bini e jeu tamo nanği ti qoteqñam niñgi deqa queqñub. Niñgi dego e beterbosib jeu tamo nanği ti qoteqñum. Dena niñgi jaqatiñ eqñub.

2

Niñgi kalil are qujaitosib qalaqalaiyo kumbra dauryiy

¹ O ijo was, Kristus a gaigai nuñgo are siñgilatetñgoqnsiqa niñgi qalaqalaingoqnsiqa nuñgo are latetñgeqñu. Qotei aqa Mondor a nuñgoq di beterejunu. Niñgi nuñgo Kristen was nanği qa are boleñgeqnaqa nanği qa duleqñub. ² E deqa niñgi qa areboleboleibeqñu. Ariya niñgi olo kumbra qudei dego yoqñibqa dena e tulañ areboleboleiboqñas. Kumbra agiende. Niñgi kalil are qujaitosib qalaqalaiyo kumbra dauryosib soqñiy. Sosib niñgi areqalo qujai na Qotei aqa wau yoqñiy. ³ Niñgi nuñgo segi jejamu qa are qalaib. Niñgi nuñgo segi ñam soqtoqñuib. Niñgi nuñgo segi ñam aguq atoqñsib olo nuñgo Kristen was nanğo ñam soqtetñroqñiy. ⁴ Niñgi nuñgo segi iñgi iñgi qa are qaloqñsib gereiyoqñuib. Niñgi

nunĝo Kristen was nanĝi qa are qaloqnsib nanĝo inĝi inĝi deĝo gereiyetnjroqniy.

*Yesus a aqa segi ñam aguq atej deqa
Qotei na a olo ñam kobaquja yej*

⁵ Niĝi Kristus Yesus aqa areqalo ojsib dauryoqniy.
⁶ Yesus a segi Qotei sosisqa ariya a deqa are qalosaioqnej.
⁷ A aqa ñam kobaquja di ojqa uratosiqa a tamo bulyosiqa a kanĝal tamo lanĝaj bul soqnej. ⁸ Deqa tamo kalil nanĝi a unoqneb di a mandam tamo soqnej. Sosisqa aqa segi ñam aguq atsiqa Qotei aqa anjam dauryosiq moiyej. Od, a ñamburbasq di moiyej. ⁹ Onaqa Qotei na a lanĝ qureq osi oqsiqa ñam kobaquja yej. Deqa bini aqa ñam dena ñam kalil tulanĝ buñnjrejunu. ¹⁰ Qotei na ñam di Yesus yej deqa mondoñ lanĝ anĝro kalil nanĝi ti tamo kalil nanĝi ti Yesus aqa areq di sinĝa pulutqab. Od, inĝi inĝi kalil lanĝ ti mandam ti mandam sorgom ti dia unub qaji nanĝi Yesus aqa areq di sinĝa pulutqab. ¹¹ Osib nanĝo medabu qujaitoqnsib maroqnqab, “Yesus Kristus a segi Tamo Koba.” Yim kumbra dena Abu Qotei aqa ñam tulanĝ goge oqoqnqas.

Niĝi suwanĝ qa kumbra tamo unĝasari nanĝi osornjroqniy

¹² O ijo was bole, e qalieonum, niĝi gaigai ijo anjam dauryeqnub. Ariya niĝi olo sinĝila na dauryoqniy. E niĝi koba na sqai bati deqa segi sai. Bini e isaq endi soqnit niĝi ijo anjam dauryqa urataib. Niĝi ijo anjam olo sinĝila na dauryoqniy. Qotei a niĝi padalo sawaq na elenej deqa niĝi ulaoqnsib lanĝ qureq oqwajqa sinĝilaoqniy. ¹³ E qalieonum, Qotei a nunĝo are miligiq di waueqnu deqa niĝi kumbra a tulanĝ areareteqnu qaji di yeqnub. Niĝi kumbra di yqajqa are koba sonaqa agi yeqnub.

¹⁴ Ariya ningi njirinoqnsib anjam na qotoqnaib. Kumbra kalil ningi yeqñub qaji di ningi lawo na yoqñiy. ¹⁵⁻¹⁶ Ningi degyqab di ningi Qotei aqa angro tintin une saiqoji sqab. Sosib ningi nambile gaigai sqajqa anjam ojoqnsib mandam qaji tamo ungasari nanngo ambleq di laqnsib suwan qa kumbra nanngi osornjroqñqab. Tamo ungasari nanngi di kumbra bole dauryqa uratoqnsib kumbra uge uge yeqñub. Deqa mondon Kristus a olo bosim nanngo une deqa nanngi peginjqas. Yim bati deqa e nunngo kumbra bole kalil qa tulan areboleboleibqas. Areboleboleibim qalieqai, wau kalil e nunngo ambleq di yoqñem qaji di e lanja yosaiqñem.

¹⁷ O ijo was, nunngo areqalo Yesus qa singilateqñub qaji di Qotei atraiyo ingi bul. Jeu tamo nanngi na e lubib moiqai kiyo? Moisiy nunngo areqalo de ti ijo leñ wain bul aiqas qaji de ti turtosiy Qotei atraiyobulqai. E moiqai di unqum. Bini e ningi ti koba na areboleboleigwas. ¹⁸ Ningi dego e ti koba na areboleboleigwas.

Pol na Timoti qarinyim a Filipai Kristen nanngoq gilqa marej

¹⁹ Tamo Koba Yesus na e odbimqa sokiñala e Timoti qarinyit a nunngoq gilqas. Gilsim olo puluosim ijoq bosim nunngo kumbra kalil qa e saibqas. Yim e qusiy are singilatqai. ²⁰ Timoti a gaigai ningi qa are qaloqnsiq deqa a na ningi aqaryaingwajqa gam ngameqnu. Tamo deqaji bei endi sosai. Aqo Timoti wo segi ningi qa are qaleqñum. ²¹ Tamo kalil nanngi nanngo segi jejamu qa are koba qaleqñub. Nanngi Yesus Kristus aqa wau qa are qalosaieqñub. ²² Timoti aqa kumbra tulan boledamu di ningi qalie. A na e wauetboqnsiqa Yesus aqa anjam bole mare mare laqnu. Angro nanngi na nanngo abu nanngi wauetnjreqñub dego kere Timoti na e wauetbeqnu. ²³ Deqa e kiñala tarijosiy kumbra kiye jeu tamo nanngi na e ebqab di qalieosiy Timoti qarinyit a nunngoq boqujatosim saingwas. ²⁴ E endegsi

qalieonum, Tamo Koba a na e gam waqtetbimqa sokiñala e segi dego nungoq bosiy nungwai.

Pol a Epafroditus qarinyqa marej

²⁵ E endegsi are qalonum, e Epafroditus dego qarinyit a nungoq gilqas. A gago Kristen was bole. A e ombla wau qujai. Aqo ombla qatqarosim jeu tamo nanji ti qoteqnum. Ningi nami a qarinyonab ijoq bosiqqa aqaryai-boqnej. ²⁶ Bini a ningi nungwajqa are koba unu. A qalie, a qure endia maiyonaqa ningi deqa qusibqa a qa are gulbeinje. ²⁷ A makobaiyonaq moiqa jojomonaqa Qotei na a boletosiqa a qa dulej. A qa segi dulosai. Qotei a e qa dego dulej. Di kiyaaqa? E are tulan gulbekobaibaim deqa. ²⁸ Deqa ijo was, e arebolebole na Epafroditus olo qarinyonum nungoq gilqo. Di kiyaaqa? Ningi a unsib tulan areboleboleingwajqa deqa. Yim e olo ningi qa are koba qalqasai. ²⁹ Deqa Epafroditus a nungoq bamqa ningi a qa tulan areboleboleingim Tamo Koba aqa ñam na gereiyoqniy. Ningi na tamo bole deqaji kalil nanjo ñam gaigai soqtetnjroqniy. ³⁰ Epafroditus a aqa segi jejamu bole sqajqa deqa are qalosaieqnu. A Kristus aqa wau ojoqnsiq deqa a moiqa jojomej. Bati deqa ningi na e aqaryaiqbqa keresai deqa ningi Epafroditus qarinyonab ijoq bosiqqa a kamba e aqaryaiiboqnej.

3

Tamo a Kristus qa aqa areqalo singilatqas di a tamo bole sqas

¹ Ariya ijo was kalil, e ijo anjam getentqai. E anjam qujai bei unu. Anjam agiende. Ningi Tamo Koba a qa tulan areboleboleingim soqniy. E anjam di olo nejnrenjyqa asgibosaieqnu. E are qalonum, anjam dena ningi aqaryaingwas.

² Ningi geregere ñam atoqniy. Tamo qudei nanği baun juwan bul sosib kumbra uge uge yeqñub. Tamo deqaji nanği muluñ aiqajqa tulañ singilaeqñub. Nango muluñ di bolesai. Di gisañ muluñ. ³ Ariya iga tamo deqaji sai. Iga muluñ bole aiyo qaji. Iga Qotei aqa Mondor aqa singila na Qotei qa louoqñsimqa Kristus Yesus aqa ñam soqte-qñum. Iga qalie, jejamu qa kumbra na iga aqaryaigwa keresai bole sai. ⁴ E nami jejamu qa kumbra dauryqajqa tulañ singilaoqñem. Tamo qudei nanği mareqñub, “Gago jejamu qa kumbra na iga aqaryaigwa kere.” O ijo was, e tamo nanği di tulañ buññrejunum. ⁵ Ijo jejamu qa kumbra agiende. E ñambabonamqa bati 8 onaqa ijo ai abu nanği na e osib muluñ waibeb. E Israel tamo. Ijo moma utru Benjamin. E Hibu anjam qalie bole. E dal anjam singila na dauryoqñem. Od, e Farisi nango kumbra na dal anjam dauryoqñem. ⁶ E Qotei aqa wau ojajqa tulañ singilaoqñem deqa e na Kristen nanği ugeugeinjoqñem. E dal anjam kalil dauryekitem deqa tamo kalil nanği na e nuboqñsib ijo une bei babtosaioqñeb. ⁷ Deqa e are qaloqñem, “Ijo jejamu qa kumbra dena tamo kalil nango kumbra tulañ buñyeqñu.” E degsi are qalsimqa ariya bunuqna e are bulyosim ijo jejamu qa kumbra kalil unem di kumbra bolesai. Degsi unsimqa e kumbra di uratosim olo Kristus aqa gam dauryoqñem. ⁸ Di segi sai. E mandam qa kumbra kalil dego uratekitem. Di kiyaaqa? E Kristus segi ojajqa deqa. E ijo Tamo Koba Kristus Yesus qa bole qalieem. Kristus qa qalieqajqa kumbra di tulañ bolequja e degsi unem. E poiwej, mandam qa kumbra kalil di qalam jiri bul. Deqa bini e Kristus segi ojajqa are koba unu. ⁹ E a segi beteryejunum. E dal anjam dauryqai gam dena e Qotei aqa ñamgalaq di tamo bole sqa keresai. Deqa e gam bei na tamo bole une saiwoji unum. Gam agiende. E Kristus qa ijo areqalo singilateqñum. Od, iga Kristus

qa gago areqalo singilatqom gam dena qujai Qotei na iga mergwas, “Ninggi ijo n̄amgalaq di tamo bole une saiqoji unub.” ¹⁰ Deqa e Kristus qa qalieqajqa are koba unu. A subq na tigelosiq singila kobaquja ej. E singila deqa qalieqajqa are koba unu. A jaqatinj osiq moiyej. Deqa e a beteryosiy a ombla jaqatinj osiy moiyoqbulqajqa are koba unu. ¹¹ E qalieonum, mondoj e olo subq na tigelqai.

Pol a Yesus aqa kumbra dauryqajqa singila na waueqnu

¹² E Kristus Yesus aqa kumbra di torei dauryekritosai unum. E gaigai kumbra di ojqajqa singila na waueqnum. Nami Yesus na e ojsiqa aqa segiq di atej deqa bini e kamba aqa kumbra ojqajqa singila na waueqnum. ¹³ O ijo was kalil, e Yesus aqa kumbra di torei ojekritosai unum. Ijo areqalo qujai agi mer̄ngwai. Jjamu qa kumbra kalil e nami dauryoqnem qaji di e uratekrosiy awai bole Qotei na mondoj ebqas qaji di oqajqa singila na waueqnum. ¹⁴ Tamo nan̄gi gurguroqnsib bubūeqnub di nan̄gi awai oqajqa. Deqo kere e awai oqa maroqnsim singila na urureqnum. Awai agiende. Kristus Yesus aqa wau na Qotei na e metbimqa e laj qureq oqsiy dia a ombla so bole gaigai sqai.

¹⁵ E areqalo bole ti sosim anjam endi nen̄grenyonum. Ninggi qudei Qotei aqa kumbra dauryqajqa singila ti unub deqa ningi deqo areqalo bole ti soqniy. Ariya ningi qudei areqalo bei ejunub kiyo? Degam Qotei na nun̄go areqalo di olo gereiyet̄ngwas. ¹⁶ Kumbra bole bole iga ojeqnum qaji di iga singila na ojesqom. Iga uratqasai.

¹⁷ O ijo was, ningi kalil gaigai ijo kumbra dauryoqniy. Osib tamo un̄gasari ijo kumbra dauryeqnub qaji nan̄gi un̄jroqnsib nan̄go kumbra deqo dauryoqniy. ¹⁸ Kristus a n̄amburbasq di moiyej anjam di tamo gargekoba nan̄gi na jeuteqnub. E nan̄gi qa bati gargekoba ningi sain̄goqnem.

Deqa bini e akam ti olo ningi saingeqnum. ¹⁹ Tamo nanği di nanęo segi jejamu qa kumbra qa are qaloqnsib dauryeqnub. Nanęo kumbra di nanği na gisaņ qotei bul ateqnub. Nanği bati gaigai mandam qa ingi ingi oqajqa are tulaņ prugnıreqnu. Osib jemaı kumbra yqajqa areboleboleinıreqnu. Deqa mondoņ nanği ņamyuwoq di torei padalqab. ²⁰ Ariya iga laņ qure qaji tamo unęasari unum deqa mondoņ Tamo Koba Yesus Kristus a laņ qureq na mandamq aisim iga elenęas. Deqa bini iga a qa tariņoqnsim unum. ²¹ Yesus a siņgila koba ti unu deqa a na ingi ingi kalil elenęosim aqa segi sorgomq di atim sqas. Aqa siņgila dena a na gago jejamu bulyetgimqa gago jejamu di Yesus aqa jejamu bulosim so bole gaigai sqas. Gago jejamu di agi bini gulbe ti jaqatiņ ti unu.

4

Ninęi Tamo Koba Yesus qa areboleboleinęoqneme

¹ Deqa ijo was bole, ninęi Tamo Koba a beteryosib siņgila na tigelesoqniy. Agi e nami ninęi degsi mernęem. E ninęi tulaņ qalaqalaingeqnum deqa e ninęi qa are koba qaleqnum. Osim ninęi qa tulaņ areboleboleibeqnu. Ninęi segi ijo awai bole bul. E awai di oqajqa waukobaeqnum.

² Ariya Yuodia Sintike wo, ninęi aiyel Tamo Koba a beteryejunub deqa ninęi aiyel ombla are qujaitosib geregere soqniy. ³ Tamo bei e ombla wauo qaji a dego Filipai di unu. E tamo di minjqai, “O was, ni na uņa aiyel nanęi di aqaryainjıime. Nanęi aiyel uņa bole. Nanęi aiyel e ombla na Yesus aqa anjam mare mare laqnem. Tamo qudei nanęi Klemen a ti dego e koba na wauoqnem. Nanęo ņam Qotei a ņambile qa buk miligiq di nengrenęey unub.”

⁴ O ijo was, ninęi bati gaigai Tamo Koba a qa areboleboleinęoqneme. E olo mernęwai. Ninęi tulaņ areboleboleinęoqneme.

⁵ Ningi lawo kumbra dauryoqñibqa tamo kalil nanngi nungo kumbra di unoqñqab. Sokiñala Tamo Koba a olo bqas. ⁶ Deqa ningi inñi bei qa areqalo kobaiyaib. Ningi gaigai nungo gulbe kalil qa Qotei pailyoqñsib a biñiyoqñsib endegsib minjoqñiy, “O Abu, ni na iga aqaryaigoqne.” ⁷ Ningi degyoqñibqa Qotei na ningi are latetñgwas. Osim a na nungo are miligi ti nungo areqalo ti taqatetñgwas. Yimqa ningi Kristus Yesus beteryosib are lawo sqab. Qotei aqa are lawo di tulañ bolequja. Are lawo di aqa utru iga geregere poigwa keresai.

⁸ Ariya ijo was, e anjam qujai bei unu. Anjam agiende. Ningi kumbra bole ti kumbra tiñtiñ ti kumbra jiga saiqoji deqa ti kumbra Qotei a tulañ areareteqnu qaji deqa ti are qaloqñsib soqñiy. Kumbra kalil tamo nanngi yeqñab iga unoqñsim biñiyeqñum qaji deqa ti are qaloqñsib soqñiy. ⁹ Od, Qotei aqa anjam kalil e nami ningi merngeqñam quoqñeb qaji di ningi dauryosib soqñiy. Ijo kumbra kalil e nami nungo ambleq di yeqñam ningi unoqñeb qaji di dego ningi dauryosib soqñiy. Yimqa Qotei a ningi ti sqas. Agi Qotei a are lawo qa utru.

Filipai Kristen nanngi na Pol aqaryaiyeb deqa a nanngi qa tulañ areboleboleiyej

¹⁰ O ijo was, ningi bini e olo aqaryaibqajqa are qaleqñub deqa e Tamo Koba a qa tulañ areboleboleibeqnu. Bole, nami ningi e qa are qaloqñeb ariya bati di ningi e aqaryaibqa gam saiqoji. ¹¹ E inñi inñi qa truqueqñum e deqa are qalosaieqñum. Ningi na e aqaryaibqajqa e deqa are qalsim anjam endi merngosai. E are lawo sqajqa kumbra qalieonum deqa gulbe kiye ijoq di brantqas di unñum, e ulaqasai. ¹² E inñi saiqoji sqai kiyo e inñi koba ti sqai kiyo di unñum, e are lawo sqai. E are lawo sqajqa kumbra qalieonum deqa e inñi kere sqas kiyo e mambqas

kiyo e inği koba ti sqai kiyo e inği qa truquoqnqai kiyo di unğum, e are lawo sqai. Gulbe kiye ijoq di brantqas di unğum, e are lawo sqai. ¹³Kristus a segi na e singilatbeqnu deqa e kumbra kalil yqa kere.

¹⁴ E gulbe ti sonamqa niği e beterbosib silali qa aqaryaiboqneb di niği keretoqneb. ¹⁵ O Filipai tamo unğasari, niği qalie, e nami Yesus aqa anjam bole palontqajqa wau utru atsim Masedonia sawa uratosim walweleqnamqa niği segi e qa are qaloqnsib silali qa aqaryaiboqneb. Kristen qudei nangi e silali qa aqaryaibo-saiogneb. ¹⁶ Agi e Tesalonaika qureq di sonamqa niği e silali qa aqaryaiboqneb. ¹⁷ Niği olo e silali ebqajqa e deqa are qalosaieqnum. Niği kumbra bole dauryibqa Qotei na kamba niği awai bole enğwajqa e deqa are qaleqnum. ¹⁸ E silali inği inği kere unu. E inği bei qa truquosai. Di kiyaaq? Niği na silali Epafroditus yeb a na osi bosiq ebej. Niği silali qa e aqaryaibeb deqa niği Qotei atraiyobuleb. Atraiyo inği di quleq bole ti. Qotei a atraiyo inği deqa tulañ areboleboleiyeqnu. ¹⁹ Qotei a Kristus Yesus aqa ñam na inği tulañ bole bole iga egoqnqas. Deqa niği inği bei qa truquoqnibqa a na enğoqnimqa niği tulañ kere na sqab. ²⁰ Qotei a gago Abu. A segi Qotei bole. Deqa iga bati gaigai aqa ñam soqtoqnqom. Bole.

Pol a Filipai Kristen nangi kaiyeinjrej

²¹ Niği Kristus Yesus aqa tamo unğasari unub. E na niği kalil kaiyeingonum. Kristen was e koba na endi unum qaji nangi na dego niği kaiyeingonub. ²² Qotei aqa tamo unğasari kalil nangi na niği kaiyeingonub. Kristen tamo unğasari Mandor Sisar aqa talq di waueqñub qaji nangi dego niği kaiyeingonub.

²³ Tamo Koba Yesus Kristus a niği qa are boleiyosim nuñgo qunuñ gegerere taqateme. Bole.

Yesus Aqa Anjam Bole 2014
The New Testament in the Anjam language of Papua New Guinea,
2014 revision
Nupela Testamen long tokples Anjam long Niugini, 2014
copyright © 2014 Wycliffe Bible Translators, Inc.

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-04-28

PDF generated using Haiola and XeLaTeX on 27 Sep 2019 from source files dated 13 May 2019

0eb339dc-c20a-5065-9483-338933d97585